

27.
457

Q. D. B. V.

MEMORIAM MASCIANAM,

simulq;

EXTEMPORALEM DISSERTATIONEM

DE

METHODO STU-
DIORUM,

ad d. XV. Mart. M DC LXXXIX.

IN GYMNASIO ZITTAVIENSI

publicè proponendam,

PATRONIS, FAUTORIBUS,

AMICIS,

decenter intimat

Auctor & Interpres

CHRISTIANUS *Weise*/RECTOR.



ZITTAVIÆ,

Typis Michaëlis Hartmanni.



Annus effluxit tertius post septuagesimum, ex quo Vir celeberrimus Dn. MICHAEL MASCUS Zitta Lufatus, Jctus, Brandenburgensis & Anhaltinus Consiliarius, Dessaviae mortuus, anniversariam sui recordationem in Gymnasio nostro suscipiendam, firmâ testamenti lege, sic instituit, ut capta dicendi occasione, docentes aliqua simul proferrent, quæ omnium ordinum Hospitibus non essent ingrata, discantibus vero certam utilitatem pollicerentur. Neq; defuerunt officiosæ suæ pietati, quicumq; ab eo tempore juventutis curam gesserunt: tum quod ipse Mascus Zittani Rectoris olim filius, non contemnendam huic ordini gloriam attulisse videretur; tum quod exemplo tam luculento constaret, homines Zittaviae natos alibi florere, ac patriam in se laudabilem, novis præconiis exornare posse. Forte qui Lipsiam hodiernum benignissimam Zittanæ juventutis matrem agnoscunt, vel ideo sibi gratulantur de Masco, quod ibidem præcipua literarum & honorum posuerit fundamenta, Rectorisq; Magnifici munus geminâ vice gestum, nobis in eâ matriculâ collocandis reddiderit pretiosum. Cæterum ad me jam redit parentandi ordo, postquam superioribus annis varia tum in Masciano hoc officio, tum in orationibus Kohlianis ac Wincklerianis, fuerunt proposita, quæ prudentiæ scho-

scholasticæ aliquam partem attingerent. Quamobrem ne vel operam hanc contempfisse, vel à fervore sæpius demonstrato defecisse videar, dispiciendum fuit, quo potissimum argumento sermonis sive pretium sive species & opinio conciliaretur. Commodè autem oculis obversabatur Dn. Morhofii Polyhistor, continens de notitiâ Auctorum & rerum commentarios: qui cum varios eosq; ut plurimum benignos promeruisset censores, non poterat legentis oculum non allicere, allectum detinere, detentum aliquo jucunditatis & utilitatis fructu confirmare. Sicut autem nihil est in universâ eruditione, quod consiliis, monitis & judiciis, ordinare, commendare, excolere non fuerit conatus: ita præ cæteris ad me pertinere videbantur capita, quæ studiorum varias methodos & curriculi Scholastici rationem comprehendunt. Etsi enim multa simul afferuntur in medium, quæ speculativa potius sunt quam practica, statumq; magis idealem & exoptandum, quam possibilem & sperandum præ se ferunt: jucundum tamen esse debet literarum sedulo cultori, vel in somnio spectare felicitatem, tot eruditorum votis sæpe expetitam & animo præfiguratam. Nec alias à contemptu vindicari studia melius possunt, quam si constet, præclarissimos passim homines ad provehendum rei literariæ florem, & excolenda præceptorum officia, tot meditationes scribendiq; & consultandi labores con-

tu-

tulisse. Nam siquid obstare videtur principiorum
consiliorumq; diversitas, dum alius commendat in
Lingvis methodum conversationis, alius extollit in-
formationem; huic arridet meditatio, alteri extem-
poralitas; hic festinando proficere vult, alter cun-
ctando; hic in memoria primam felicitatem collo-
cat, alter in iudicio: singula tamen aliquid ad augen-
dam prudentiam conferunt: ut in publicis delibera-
tionibus suffragia quamlibet contraria, veritatis &
utilitatis cognitionem reddunt aliquanto certio-
rem. Jam alienum à rebus meis non fuerit, allegare qua-
lemquam informationis experientiam, quam & e-
ducatio paterna, & annorum non paucorum labor,
& auditorum copiosissimus affluxus, comparavit.
Ut nunc quoque rem facturus videar, & testamento
Masciano congruam, & officio meo dignissimam,
siquid de **STUDIORUM METHODO**, quin & de
FALLACIIS inibi frequentissimis meditari aggrediar.
Destinatus autem huic negotio jam est dies Martis,
post emortualem Masci proximus, quem **DEUS**
faustum & felicem illucescere jubeat. Ac proinde,
quorum interest vel florere scholas, vel post mortem
vigere bene meritos, ut favore & affectu suo nos pro-
sequantur ita rogo, ut qui futurus sim ad officiorum
singula genera paratissimus. Deus fervet Patriam, in
mediis bellorum incendiis coelesti beneficio tutam
hactenus & quietam. *P. P. Dominica Oculi.*

M DC LXXXIX.